

CHINESE-JAPANESE LIBRARY  
HARVARD-YENCHING INSTITUTE  
AT HARVARD UNIVERSITY  
APR 15 1952

02

T5295 /714

唐丞相曲江張先生文集卷之三

雜詩 口號

餞王尚書出邊

送趙都護

送使廣州

送姚評事入蜀

送竇校書

餞王司馬入計

東湖臨泛

餞梁明府

餞陳學士

通化門送別

送楊道士

送李功曹

送趙少府

送李少府

送蘇主簿

送周判官

別鄉人南還

別孫侍郎

贈孫朝

江上遇疾風



初發江陵

自豫章南還

贈京邑親知

呈裴宣州

寄王震

懷趙二

南陽道中作

西江夜行

使還湘水

道中寄遠

湘中作

自湘水南行

南還湘水言懷

初入湘中有喜

商洛山行懷古

耒陽谿夜行

江上

自彭蠡湖入江

赴使瀧峽

湖口望廬山瀑布

彭蠡湖上

至玄武湖入廬山望瀑布

次廬山

巡屬縣道中作

贈京都舊寮

贈王司馬

奉使南海

湏陽峽

使至廣州

春江晚景

津亭曉望

曲江溪中

始興溪夜上赴嶺

藍田玉山南行

巡按自離水南行

使還都湘東作

旅宿淮陽亭

望月懷遠

秋夕望月

詠鸞

詠史

勅賜寧主池宴

龍門旬宴

天津橋宴

上賜水殿旬宴

荆谷山集會

申王園亭集宴

樂遊園宴

逍遙公舊居

王泉山寺

再往王泉山寺

樊妃塚

戲題春意

月夜聞鴈

晨起對雪

庭梅詠

照鏡見白髮

折楊柳

巫山高

剪綵

聽箏

賦得自君之出

荊州作二首

在郡秋懷二首

獨處見群鶴

為郡守戀內職

初秋憶兩弟

見群鴈憶二弟

將還鄉示諸弟

叙懷二首

詩秋懷

雜詩五首

李尚書挽歌三首

蘇公挽歌三首

蘇氏挽歌三首

康司馬挽歌

題畫山水障

餞王尚書出邊

漢相推人傑殷宗伐鬼方還聞出將重坐見即戎良

上策應為豫中權且用光令中兵氣倍威懾虜魂亡

樹比公孫大城如道濟長夏雲登隴首秋露怯遼陽

武德舒宸睠文思餞樂章感恩身既許激節膽猶嘗

祖帳傾朝列軍麾駐道傍詩人何所詠尚父欲鷹揚

送趙都護赴安西

將相有更踐簡心良獨難遠圖嘗畫地超拜乃登壇  
戎即崑山序車同渤海單義無中國費情必遠人安  
他日文燕武而今粟且寬自然來月窟何用刺樓蘭  
南至三冬晚西馳萬里寒封侯自有處征馬去嘽嘽

送使廣州

家在湘源住君今海嶠行經過中正道相送倍爲情  
心逐書郵去形隨世網嬰因聲謝遠別緣義不緣名  
送姚評事入蜀各賦一物得卜肆

蜀巖化已久沉冥空所思嘗聞賈下處猶憶下簾時

驅傳應經此懷賢儻問之歸來說往事歷歷偶心期

送竇校書見餞得雲中辨江樹

江水連天色天涯淨野氛微明岸傍樹凌亂渚前雲  
舉棹形隨轉登艫意漸分渺茫從此去空復惜離群

餞王司馬入計同用洲字

元寮行上計舉餞出林丘忽望題輿遠空思解榻遊  
別筵鋪柳岸征棹倚蘆洲獨歎湘江水朝宗向北流

東湖臨泛餞王司馬

南土秋雖半東湖草木黃聊乘風日好來泛芰荷香  
蘭棹每勞速菱歌不厭長忽懷京洛去難與共清光

錢濟陰梁明府各探一物得荷葉

荷葉生幽渚芳華信在茲  
朝朝空此地采采欲因誰  
但恐星霜改還將蒲柳衰  
懷君美人別聊以贈心期

錢陳學士還江南同用徵字

荷篠旋江澳銜杯餞霸陵  
別前林鳥息歸處海煙凝  
風土鄉情接雲山客念憑  
聖朝巖穴選應待鶴書徵  
通化門外送別

屢別容華改長愁意緒微  
義將私愛隔情與故人歸  
薄宦無時賞勞生有事機  
離魂今夕夢先繞舊林飛

送楊道士往天台

鬼谷還成道天台去學仙  
行應松子化畱與世人傳  
此地煙波遠何時羽駕旋  
當須一把袂城郭共依然

送楊府李功曹

平生屬良友結綬望光輝  
何知人事拙相與宦情非  
別路穿林盡征帆際海歸  
居然已多意况復兩鄉違

送宛句趙少府

解巾行作吏樽酒謝離居  
脩竹含清景華池澹碧虛  
地將幽興慙人與舊遊疎  
林下紛相送多逢長者車

送韋城李少府

送客南昌尉離亭西候春  
野花看欲盡林鳥聽猶新

別酒青門路歸軒白馬津  
和知無遠近萬里尚爲鄰  
送蘇主簿赴偃師

我與文雄別胡然邑吏歸  
賢人安下位鷲鳥欲卑飛  
激節輕華冕移官徇綵衣  
羨君行者樂從此拜庭闈  
送廣州周判官

海郡雄蠻落津亭壯越臺  
城隅百雉映水曲萬家開  
里樹桄榔出時禽翡翠來  
觀風猶未盡早晚使車迴  
別鄉人南還

橘柚南中暖桑榆北地陰  
何言榮落異因見別離心  
吾亦江鄉子思歸夢寐深  
聞君去水宿結思渺雲林

牽綴從浮事遲迴謝所欽  
東南行舫遠秋浦念猿吟  
郡江南上別孫侍郎

雲嶂天涯盡川途海縣窮  
何言此地僻忽與故人同  
身負邦君弩情紆御史驄  
王程不我駐離思逐秋風  
奉酬洪州江上見贈監察御史孫翊

受命讞封疆逢君牧豫章  
於焉塞虞芮復爾共舟舫  
悵別秋陰盡懷歸客思長  
江皋托離贈持此慰他鄉  
江上遇風疾

疾風江上起鼓怒揚煙埃  
白晝晦如夕洪濤聲若雷  
投林鳥鍛羽入浦魚曝鱗  
瓦飛屋且發帆快檣已摧

不知天地氣何爲此喧騰

初發江陵有懷

極望涔陽浦江天渺不分扁舟從此去鷗鳥自爲群  
他日懷真賞中年負俗紛適來果微尚倏爾會斯文  
復想金閨籍何如夢渚雲我行多勝寄浩思獨氛氲

自豫章南還江上作

歸去南江水磷磷見底清轉逢空闊處聊洗滯留情  
浦樹遙如待江鷗近若迎津途別有趣况乃濯吾纓

道逢北使題贈京邑親知

征騶稍靡靡去國方遲遲路遶南登岸情搖北上旗

故人憐別日旅鴈逐歸時歲晏無芳草將何寄所思

江上使風呈裴宣州

江路與天連風帆何淼然遙林浪出沒孤舫鳥聯翩  
常自千鈞重深思萬事捐報恩非狗祿還逐賈人船

谿行寄王震

山氣朝來爽谿流自向清遠心何處愜閑掉此中行  
叢桂林間待群鷗水上迎徒然適我願幽獨爲誰情

將至洛陽有懷趙二

湘浦多深林青冥晝結陰獨無謝客賞况復賈生心  
草色雖云發天光或未臨江潭非所遇爲爾白頭吟



南陽道中作

登郢屬歲陰及宛漕所造復開東漢主道此南都迹  
佳氣藹厥初霸圖紛在昔茲邦稱貴近與世嘗薰赫  
遭遇感風雲變衰空草澤不識鄧公樹猶傳陰后石  
驅馬歷闔闔荆榛翳阡陌事去物無象感來心不擇  
懷古對窮秋興言傷遠客眇默遵岐路辛勤弊行役  
雲馬號相呼林麇走自索顧憶狗書劍未嘗安枕席  
豈暇暴突黔空持遼豕白迷復期非遠歸歟賞農隙

西江夜行

遙夜人何在澄潭月裏行悠悠天宇曠切切故鄉情

外物寂無擾中流澹自清念歸林葉換愁坐露華生  
猶有汀洲鶴宵分乍一鳴

使還湘水

歸舟宛何處正值楚江平夕迥煙村宿朝緣浦樹行  
于役已彌歲言旋今愜情鄉郊尚千里流目夏雲生

初發道中寄遠

日夜鄉山遠秋風復此時善聞胡馬思今聽楚猿悲  
念別朝昏苦懷歸歲月遲北園空不息常恐髮如絲

湘中作

湘流繞南嶽絕日轉青嶺懷祿未能已瞻途屢所經

煙嶼宜春望林猿莫夜聽  
水路日多緒孤舟天復冥  
浮沒從此去嗟嗟勞我

自湘水南行

落日催行舫逶迤洲渚間  
誰云有物役乘此更休閒  
暝色生前浦清暉發近山  
中流澹容與唯愛鳥飛還

南還湘水言懷

拙宦今何有勞歌念不成  
十年垂夙志一別悔前行  
歸去田園老僮來軒冕輕  
江間稻正熟林裏桂初榮  
魚意思在藻鹿心懷食  
葦時哉苟不達取樂遂吾情

初入湘中有喜

征鞍窮郢路歸棹入湘流  
望鳥唯貪疾聞猿亦罷愁  
兩邊楓作岸數處橘爲洲  
却計從來憶翻疑夢裏遊

商洛山行懷古

園綺值秦末嘉遁此山阿  
陳迹向千古荒途始一過  
碩人久淪謝喬木自森羅  
故事昔嘗覽遺風今豈訛  
泌泉空活活樵叟獨皤皤  
是處清暉滿從中幽興多  
長懷赤松意復憶紫芝歌  
避世辭軒冕逢時解薜蘿  
盛明今在運吾道竟如何

耒陽溪夜行

乘夕棹歸舟緣源路轉幽  
月明看嶺樹風靜聽溪流

嵐氣船間入霜華衣上浮猿聲雖此夜不是別家愁

江上

長林何繚繞遠水復悠悠盡日餘無見爲心那不愁  
憶將親愛別行爲主恩酬感敷空如此芳時屢已邁

自彭蠡湖初入江

五岫殊空闊雲煙處處浮上來群噪鳥中去獨行舟  
半落誰相顧逶迤日自愁更將心問影于役復何求

赴使瀧峽

谿路日幽深寒空入兩欵霜清百丈水風落萬重林  
夕鳥聯歸翼秋猿斷去心別離多遠思况乃歲方陰

湖口望廬山瀑布水

萬丈洪泉落迢迢半空奔奔飛下雜樹洒落出重雲  
日照虹蜺似天清風雨聞靈山多秀色空水共氤氳

彭蠡湖上汎

公涉經大湖湖流多行泐决晨趨北渚逗浦已西日  
所適雖淹曠中流且閑逸瑰詭良復多感見乃非一  
廬山直陽潯孤石當陰術一水雲際飛數峰湖心出  
象類何交糺形言豈深悉且知皆自然高下無相恤

經江寧覽舊跡至玄武

南國更數世北湖方十洲天清華林苑日晏景陽樓

果下迴仙騎津傍駐綵旒  
鳧鷖喧鳳管荷芰闢龍舟  
七子結詩賦千人和棹謳  
應言在鎬樂不讓橫汾秋  
風俗因紆慢江山成易由  
駒王信不武孫叔是無謀  
佳氣日將歇霸功誰與脩  
業田東海變麋鹿姑蘇遊  
否運爭三國康時劣九州  
山雖幕府在館豈豫章留  
水沆還相閱菱歌亦故道  
雄圖不足問唯想事風流  
入廬山仰望瀑布水

絕頂有懸泉喧喧出煙杪  
不知幾時歲但見無昏曉  
閃閃青崖落鮮鮮白日皎  
洒流濕行雲濺水驚飛鳥  
雷吼何噴薄箭馳入窈窕  
昔聞山下蒙今乃林巒表

物情有詭激坤元曷紛矯  
默然置此去變死誰能了

出爲豫章郡途次廬山東巖下

茲山鎮何所乃在澄湖陰  
下有蛟螭伏上與虹蜺尋  
靈仙未始曠窟宅何其深  
斐闕出雲峙三官入煙沉  
攀崖猶惜鏡種杏非舊林  
想像終古跡惆悵獨往心  
紛吾嬰世網數載忝朝簪  
孤根自靡託量力况不任  
多謝周身防常恐橫議侵  
豈匪鸚鴻列惕如泉壑臨  
迨茲刺江郡來此滌塵襟  
有趣逢樵客忘懷狎野禽  
棲閑義未果用拙歡在今  
願言答休命歸事丘中琴

巡屬縣道中作

春令夙所奉駕言遵此行途中却郡椽林下招村民  
至邑無紛列來人但歡迎豈伊念邦政爾實在時清  
短才濫符竹弱歲起柴荆再入江村道求懷山藪情  
矧逢陽節獻默聽時琴鳴迹與素心別感從幽思盈  
流芳日不待夙志蹇無成知命且何欲所圖唯退畊  
華簪極身泰衰鬢慙木榮苟得不可遂吾其謝在嬰

南還以詩代書贈京都舊寮

薄宦晨昏闕遵尊我取斯窮愁年貌改寂歷爾胡爲  
不諛詞多忤無容禮益卑微生尚何有遠跡固其宜  
思援梁山曲情遙越鳥枝故園從海上良友邈天涯

雲雨歎一別川原勞載馳上慙伯樂顧中負叔牙知  
去國誠寥落經途獎險巖歲逢霜雪苦林屬蕙蘭萎  
欲贈幽芳歇行悲舊賞秘一從閑作限兩見月成規  
苒苒窮年齋行行盡路岐征鞍稅北渚歸帆指南垂  
樹晚猶葱蒨江寒尚渺瀰士風從楚別山水入湘竒  
石瀨相奔觸煙林更蔽虧層崖夾洞浦輕舸泛澄漪  
松篠行皆傍禽魚動輒隨惜哉邊地隔不與故人窺  
疇昔陪鴛鴦朝陽振羽儀米音雖寂寞接景每逶迤  
朝罷冥塵事賓來話酒卮邀歡逐芳草結興選華池  
及此風成歎何時露可披自憐無用者誰念有情離

望美音容闊懷賢夢想疲困聲達霄漢持拙守東陂  
初發道中贈王司馬兼寄諸公

昔歲嘗陳力中年退屏屈承顏方弄馬放性或觀魚  
曾是安疵拙誠非議卷舒林園事益簡煙月賞恒餘  
不意棲愚谷無階奉詔書湛恩均大造弱植愧空虛  
肅命趨仙闕僑裝撫傳車念行開祖帳憐別降題輿  
誰謂風斯許叨延禮數除義沾投分末情及解携初  
追餞扶江界光輝燭里閭子雲應寂寞公緒爲吹嗑  
景物春來異音容日向踈川原行稍穩鍾鼓聽猶徐  
林隔王公輦雲迷班氏廬戀親唯委咽思德更躊躇

狗義當由此懷安乃闕如願酬明主惠行矣豈徒歎

夏日奉使南海在道中作

緬然萬里路赫曦三伏時飛走逃深林流爍恐生疵  
行李豈無苦而我方自怡肅事誠在公拜慶遂及私  
展力慚淺效銜恩感深慈且欲湯火蹈况無鬼神欺  
朝發高山阿夕濟長江湄秋瘴寧我毒夏水胡不夷  
信知道存者但問心所之呂梁有出入乃覺非虛詞

滇陽峽

行舟傍越岑窈窕越溪深水閭先秋冷山晴當晝陰  
重林間五色對壁從千尋惜此生遐遠誰知造化心

使至廣州

昔年嘗不調茲地亦遼迴木謂雙鳧少何知駟馬來  
人非漢使橐郡是越王臺去去雖殊事山川長在哉

春江晚景

江林皆秀發雲日復相鮮征路那逢此春心益眇然  
興來祇自得佳處莫能傳薄暮津亭下餘花滿客船

與王六履震廣州津亭曉望

明發臨前渚寒來淨遠空水紋天上碧日氣海邊紅  
景物紛爲異人情賴此同乘桴自有造非欲破長風

初發曲江谿中

溪流清且深松石復陰臨正爾可嘉處胡爲無賞心  
我由不忍別物亦有緣侵自匪嘗行邁誰能知此音

自始興谿夜上赴嶺

嘗畜名山意茲爲世網牽征途屢及此初復已非然  
日落青巖際谿行綠篠邊去舟乘月後歸鳥息人前  
數曲迷幽嶂連圻觸闔泉深林風緒結遙夜客情懸  
非梗胡爲泛無膏亦自煎不知于役者相樂在何年

奉使自藍田玉山南行

征驂入雲壑情始步金門通籍微軀幸歸途明主恩  
匪唯狗行役兼得慰晨昏是節暑云熾紛吾心所尊

海縣且悠緬山郵日馳奔徒知惡罌事未暇息陰論  
曉武經陳迹衡湘指故園水聞南澗險煙望北林繁  
遠靄千巖合幽聲百籟喧陰泉夏猶凍陽景晝方暎  
懿此高深極徒令夢想存盛明期有報長徃復奚言

巡按自灘水南行

理棹雖云遠飲水寧有惜况乃佳山川怡然傲潭石  
竒峰岌前轉茂樹隈中積猿鳥聲自呼風泉氣相激  
目因詭容逆心與清暉絛紛吾謬執簡行郡將移檄  
即事聊獨歡素懷豈無適悠悠詠靡監庶以窮日夕

使還都湘東作

蒼庚昨歸候陽鳥今去時感物遽如此勞生安可思  
養真無上格圖進豈前期甘節往來苦壯容離別衰  
盛明非不遇弱操自云私孤楫清川渚征衣寒露滋  
風朝津樹落日夕嶺徼悲牽役而無悔坐愁衽自怡  
當須報恩已終尔謝塵縉

旅宿淮陽亭口號

日暮荒亭上悠悠旅思多故鄉臨桂水今夜眇星河  
暗草霜華發空亭鴈影過興來誰與晤勞者自爲歌

望月懷遠詩

海上生明月天涯共此時情人怨遙夜竟夕起相思



滅燭憐光滿披衣覺露滋不堪盈手贈還寢夢佳期

秋夕望月

清迥江城月流光萬里同所思如夢裏相望在庭中  
皎潔青苔露蕭條黃葉風含情不得語頻使桂華空

詠鷺

海燕何微眇乘春亦暫來豈知泥滓賤祇見玉堂開  
繡戶時雙入華軒日幾迴無心與物競鷹隼莫相猜

詠史

大德始無頗中智是所是居然已不一况乃務相詭  
小道致泥難巧言因萋毀穰侯或見遲蘇生得陰揣

輕既長沙傳重亦邊郡徙勢傾不幸然跡在胡寧爾  
滄溟所為大江漢日來委澧水雖復清魚鱉豈游此  
賢哉有小白讎中有管氏若人不世生悠悠多如彼  
勅賜寧主池宴

賢王有池館明主賜春遊淑氣林間發恩光水上浮  
徒叅和鼎地終謝巨川舟皇澤空如此輕生莫可酬  
龍門旬宴得月字韻

恩華逐芳歲形勝蕪韶月中席傍魚潭前山倚龍闕  
花迎妙妓至鳥避仙舟發宴衍良在茲再來情不歇  
天津橋東旬宴得歌字韻

清洛象天河東流形勝多朝來逢宴喜春盡却妍和  
泉鮪歡時躍林鷺醉後歌賜恩頻若此爲樂柰人何  
上賜水牕旬宴得移字韻

河漢非應到汀洲忽在斯仍逢帝樂下如遂海槎窺  
春賞時將換皇恩歲不移今朝遊宴所莫比天泉池  
故刑部李尚書荆谷山集會

嘗聞繼老聃身退道迷耽結宇倚青壁疏泉噴碧潭  
苔石隨人古煙花寄酒酣山光紛向夕歸興杜城南

三月三日申王園亭宴集

稽亭並往事睢苑勝前聞飛閣凌芳樹華池落綵雲

藉草人留酌銜花鳥赴群向來同賞處惟恨碧林曛

恩賜樂遊園宴

寶筵延厚命供帳序群公形勝宜春接威儀建禮同  
晞陽人似露解愠物從風朝慶千齡始年華二月中  
輝光遍草木和氣發絲桐歲歲爲無事寧知樂九功

驪山下逍遙公舊居遊集

君子體清尚歸處有蕪資雖然經濟日無忘幽棲時  
卜居舊何所休澣嘗來茲岑寂幽人至高深獲我思  
松澗聆遺風蘭林覽餘滋往事誠已矣道存猶可追  
遺子後黃金作歌先紫芝明德有自來奕世皆秉彝

豈與磻溪老崛起周大師我心希碩人逮此問元龜  
怛悵旣懷遠沉吟亦省私已云寵祿過况在華髮衰  
軒蓋有迷復立壑無磷緇感物重所懷何但止足斯

祠紫蓋山經王泉山寺

指塗躋楚望策門望荆岑稍稍松篁入冷冷澗谷深  
觀竒逐幽映歷險志嶇嶇上界投佛影中天賜梵音  
梵音馘在昔禮足誓來今靈異若有對聖先其可尋  
高星聞逝者遠俗是初心薜剝經行處猿啼燕坐林  
歸真已寂滅留迹豈埋沉法地自茲廣何云千萬金  
冬中至玉泉山寺獨窮陰水閣崖谷無景及

仲春行縣復山馬故有此作

靈境信幽絕芳時重暄妍再來及茲勝一遇非無緣  
萬木柔可結千花敷欲然松間鳴好鳥林下流清泉  
石壁間精舍金光照法筵真空本自寂假有聊相宣  
復此灰心者仍追巢頂禪簡書雖有畏身世亦俱捐

郢城西北有大古塚數十觀其封域多是楚

時諸王而年代久遠不復可識唯直西有

樊妃冢因後人爲植松栢故行路盡知之

蘋藻生南澗蕙蘭秀中林嘉名有所在芳氣無幽深  
楚子初逞志樊妃嘗獻箴能令更擇士非直罷從禽

舊國皆湮滅先王亦莫尋唯傳賢媛隴猶結後人心  
牢落山川意蕭疎松栢陰破墻時直上荒徑或斜侵  
惠問終不絕風流獨至今千春思窈窕黃鳥復哀音

戲題春意

一作江南守江林三四春相鳴不及鳥相樂喜關人  
日守朱絲直年催華髮新淮陽祇有卧持此度芳辰  
同綦毋學士月夜聞馬

棲宿豈無意飛飛更遠尋長途未及伴中夜有遺音  
月思關山路風號流水琴空聲兩相應幽感一何深  
避繳歸南浦離群叫北林  
照翻俱不定憐爾越鄉心

立春日晨起對積雪

忽對林亭雪瑤華處處開今年迎氣始昨夜伴春迴  
玉潤窓前竹花繁院裏梅東郊齋祭所應見五神來

庭梅詠

芳意何能早孤榮亦自危更憐花帶弱不受歲寒移  
朝雪那相妬陰風已屢吹馨香雖尚爾飄蕩復誰知  
照鏡見白髮聯句

宿昔青雲志蹉跎白髮年誰知明鏡裏形影自相憐  
折楊柳

織織折楊柳持此寄情人一枝何足貴憐是故園春

遲景那能久流芳不及新更愁征戍客容鬢老邊塵

巫山高

巫山與天近煙景嘗青燐此中楚王夢夢得神女靈  
神女去已久雲雨空冥冥唯有巴猿嘯哀音不可聽

剪綵

姹女矜容色爲花不讓春既爭芳意早誰待物華真  
葉作參差發枝從點綴新自然無限態長在艷陽人

聽箏

端居正無緒那復發秦箏纖指傳新意繁絃起怨情  
悠揚思欲絕掩抑態還生豈是聲能感人心自不平

賦得自君之山山矣

自君之出矣不復理機思君如滿月夜夜減清輝

荊州作二首

先達志其大求意不約文士仲在知己已况仕於君  
微誠夙所尚細故不足云時來忽易失事往良難分  
顧念凡近姿焉欲殊常勲亦以行則是豈必素有聞  
千慮且猶跌萬緒何其紛進士苟非黨免相安得群  
衆口金可鑠孤心絲其棼意忠仗朋信語勇同敗軍  
古劍徒有氣幽蘭祇自薰高秩向所忝於義如浮雲

其二

千載一遭遇往賢所至難問余奚爲者無階忽上搏  
明聖不世出翼亮非苟安崇高自有配孤陋何足干  
遇恩一時來竊位三歲寒誰謂誠不盡知窮力亦殫  
雖致負乘寇初無挾術鑽浩蕩出江湖翻覆如波瀾  
心傷不林樹自念獨飛翰狗義在匹夫報恩猶一殮  
况乃山海澤效無毫髮端內訟已慙沮積毀今摧殘  
胡爲復惕息傷鳥畏虛彈

在郡秋懷二首

秋風入前林蕭颯鳴高枝寂寞遊子思寤歎何人知  
宦成名不立志存歲已馳五十而無聞古人深所疵

平生去外飾直道如不羈未得操割效忽復寒暑移  
物情自古然身退毀亦隨悠悠滄江渚望望白雲涯  
踞下霜且降澤中草離披蘭艾石不分安用馨香爲

其二

庭蕪生白露歲候感遐心策蹇慙遠途巢枝思故林  
小人恐致寇終日如臨深魚鳥好自逸池籠安所欽  
掛冠東都門採葢南山岑議道誠愧昔覽分還慙今  
無然憂成老空爾白頭吟

郡府中每晨輒見群鶴東飛至暮又行列  
而返嗷嗷雲路其和樂焉予愧獨處江城

常目送此意有所羨遂賦以詩

雲間有數鶴撫翼意無遺曉日東出去宵煙北渚歸  
謹呼良有適羅列好相依遠集長江靜高翔衆鳥稀  
豈煩仙子馭何畏野人機却念乘軒者拘留不得飛  
忝官二十年盡在內職及爲郡嘗積戀因賦

詩焉

江流去朝宗晝夜茲不舍仲尼在川上子牟存闕下  
聖達有由然孰是無心者一郡苟能化百城豈云寡  
愛禮誰爲牟戀主吾猶馬感初時不載思奮翼無假  
閑字嘗自閑沉心何用寫攬衣步前庭登陴臨曠野

白水生迢遞清風寄瀟灑言采芳澤頤終朝不盈把

初秋憶金均兩弟

江渚秋風至他鄉離別心孤雲愁自遠一葉感何深  
憂喜嘗同城飛鳴忽異林青山西北望堪作白頭吟  
二弟宰邑南海見群鴈南飛因成詠以寄

鴻鴈自北來嗷嗷度煙景嘗懷稻梁惠豈憚江山末  
小大每相從羽毛當自整雙鳧侶晨泛獨鶴叅宵警  
爲我更南飛因書至梅嶺

將發還鄉示諸弟

歲陽亦頽止林意日蕭摵云胡當此時緬邁復爲客

至愛孰能捨名義來相迫負德良不貲輸誠靡所惜  
一木逢厦構纖塵願山益無力主君恩寧利客卿壁  
去去榮歸養無然歎行役

叙懷二首

弱歲讀群史抗迹追古人被褐有懷玉佩印從負薪  
志合豈兄弟道行無賤貧孤根亦何賴感激此爲鄰

其一

晚節從卑秩岐路良非一既聞持兩端復見挾三術  
木瓜誠有報玉楮論無實已矣直躬者平生壯圖失  
去去勿重陳歸來茹芝朮

秋懷

感惜芳時換誰知客思懸憶隨鴻向暖愁學馬思邊  
留滯機還息紛拏網自牽東南起歸望何處是江天

雜詩五首

孤桐亦胡爲百尺傍無枝踈陰不自覆脩幹欲何施  
高岡地復迥弱植風屢吹凡鳥已相噪鳳凰安得知

其二

蘿葛必有託風霜不能落酷在蘭將蕙甘從葵與藿  
運命雖爲宰寒暑自迴薄悠悠天地間委順無不樂

其三



良辰不可遇 心賞更蹉跎 終日塊然坐 有時勞者歌  
庭前攬芳蕙 江上託微波 路遠無能達 憂情空復多

其四

湘水弔靈妃 班竹爲情緒 漢水訪遊女 解佩無誰與  
同心不可見 異路空延佇 浦上青楓林 津傍白沙渚  
行吟至落日 坐望祇愁予 神物亦豈孤 佳期竟何許

其五

木直幾自寇 石堅亦他攻 何言爲用薄 而與火膏同  
物累有固然 誰能取徑通 纖纖良田草 靡靡唯從風  
日夜沐甘澤 春秋等芳叢 生性苟不天 香晷誰爲中

道家貴至柔 儒生何固窮 終始行一意 無乃過愚公

故刑部李尚書挽歌詞三首

仙宗出趙北 相業起山東 明德嘗爲禮 嘉謀屢作忠  
論經白虎殿 獻賦甘泉宮 與善今何在 蒼生望已空

其二

宿昔三台踐 榮華駟馬歸 印從青瓊拜 翰入紫宸揮  
題劔恩方重 藏舟事已非 龍門不可望 感激涕沾衣

其三

永歎常山寶 沉埋京兆阡 同盟會五月 華表記千年  
渺漫野中草 微茫空裏煙 共悲人事絕 唯對杜陵田

故徐州刺史贈吏部侍郎蘇公挽歌詞三首  
韋玄方繼相荀爽復齊名在貴兼天爵能賢出世卿  
學聞金馬詔神見玉人情藏壑今如此爲山遂不成

其二

相如只謝病子敬忽云亡豈悟瑤臺雪分離玉樹行  
清規留草議故事在封章本謂山公啓而今歿始揚

其三

返葬長安陌秋風簫鼓悲奈何相送者不是平生時  
寒影催年急哀歌助晚遲寧知建旗罷丹旄向京師

故滎陽君蘇氏挽歌詞三首

門緒公侯列嬪風詩禮行松蘿方有寄桃李忽無成  
劔去雙龍別雛哀九鳳鳴何言嶧山樹還似半心生

其二

永嘆芳魂斷行看草露滋二宗榮盛日千古別離時  
竟罷生芻贈空留畫扇悲客車候曉發何歲是歸期

其三

縞服紛相送玄扃翳不開更悲泉火滅徒見柳車迴  
舊室容衣奠新塋拱樹栽唯應月照簾潘岳此時哀

眉州康司馬挽歌詞

家受專門學人稱入室賢劉楨徒有氣管輅獨無年

山莊集卷之三  
十五  
謫去長沙國竟歸京兆阡從來匣中劔埋歿罷衝天

題畫山水障

心累猶不盡果爲物外牽偶因耳目好復假丹青妍  
嘗抱野間意而迫區中緣塵事固已矣秉意終不遷  
良工適我願妙墨揮巖泉變化合羣有高深侔自然  
置陳北堂上做像南山前靜無戶連出行已茲地偏  
萱草憂可樹合歡忿亦蠲所因本微物况乃憑幽筌  
言象會自泯意色聊自宣對翫有佳趣使我心眇綿

唐丞相曲江張先生文集卷之三 終

唐丞相曲江張先生文集卷之四

勅書 制書

勅皇太子納妃

勅朝集使書

勅朝集使書

勅朝集使書

勅朝集使書

勅歲初處分

勅令禮部掌貢人

勅幸西京

勅置十道使

勅授十道使

勅處分舉人

勅停官祭贈太子

勅處分縣令書

勅處分縣令書

勅處分選人

勅議放私鑄錢

勅宴朔方將士

勅宴幽州老人

勅慮囚 勅擇日告廟

籍田制

諸王實封制

貶韓朝宗制

廢王皇后制

停燕國公中書令制

勅皇太子納妃

勅禮有謹於初義亦重其本凡是媼媁且猶正於人倫况在元良更將承於宗祧皇太子鴻儲副是屬仁孝自然爰從吉辰式備嘉禮上事下繼君子重之言告言歸朕豈無慰非獨在予之慶宜申與衆之澤應天下囚徒死罪特宜免死配流嶺南遠處流罪降至

徒徒已下罪並宜釋放其造僞不首勾合知情受僞人等罪雖徒流仍便隸爲百姓至彼勿許東西諸道征行人家及鰥寡悖獨委州縣長官檢校矜放差科使安其業中間有不支濟者量事賑給仍量助其營種長安萬年兩縣百姓及今月當上曠騎衛士雜匠掌閑幕士駕士工人樂人供膳主膳官馬主食弓等並免其家今年地稅三衛細引飛騎萬騎監門長上及禮生有職掌者各減一年勞在京文武官九品已上見在京外官因公使及當上在京新除五品已上外官未辭并致仕官朝朔望者各賜勲一轉東宮官

九品已上諸司緣禮會祗供官等更加勲一轉五禮  
使兵部尚書兼中書令蕭嵩特封徐國公禮會使黃  
門侍郎同中書門下平章事韓休特與三品妃禮會  
使少府監馮紹正賜紫金魚袋諸副使及判官更加  
勲一轉禮官僉者夾侍官及孔目官使典主旌節等  
選日優與處分仗內馬家內侍省給使教坊音聲人  
緣太子禮會祗供者各賜勲一轉皇太子舅尚輦奉  
御趙迥進特與三品仍改三品官前右武衛騎曹趙  
迥進特與五品仍改與五品官皇太子侍讀侍書等  
各加一階皇太子諭德潘蕭特與五品太子妃兄通  
事舍人薛愿特與五品仍改與五品官兄吏部常選  
特與五品仍與六品官今日應預會官等各節級給  
賜物即宜領取宴慰者所以宣其情頒錫者所以將  
其意公卿百辟庶知朕心

勅處分十道朝集使

勅朝集使等朕恭已承天守文繼位布一心於兆庶  
明四目於萬方恒恐道或未周物不遂性旁求俊乂  
共理黎元于茲群辟寧不我副凡今政要略有四端  
衣食本於桑農禮義興於學校流亡出於不足爭訟  
由於無耻故先王務其三時將以厚生也脩其五教

將以惇俗也有國有家同知此議不患不知患在不  
行爾且長吏數改政教屢移在官當先為國理人各  
揚其職不當冒榮干進苟利其身澆俗不可不革淳  
風不可不長近令刺史在任四考方遷實欲始終其  
情黜陟斯繫必若縣得良宰萬戶息肩州有賢牧千  
里解帶仁政不遙行之則是皆能勵節朕復何有且  
如浮逃客戶所在安輯征鎮人家每事憂恤倉儲唯  
實賦役唯均鰥寡撫存盜賊禁止郵驛無弊姦訛不  
生念茲八事朕常屢想嗟爾庶尹可不用心卿等還  
州遞相勸勉遵此王度恤彼下人敬順天常無違月

令夫星列躔次土分區域休咎之徵惟人所感善必  
知主惡亦有由每至歲成當加賞罰宜知朕意並即  
好去

勅處分十道朝集使

勅朕臨御天下二十餘載每念至理實仗群賢何嘗  
不敷求循良共底于道隳然執光寵有加甘靈鳳  
凰寂寥無紀豈朕之不德感政止然為庶尹所能已  
極於此是用寤寐增歎殷勤未懷更為後圖或未晚  
也且一郡之政繫一已之能泉源既清蓬麻自直為  
長吏者可不勉之卿等至州遞想慰誨以副共理之

意用光分憂之委且如江左爰及山南歲小不登人  
已菜色皆由好逐朝夕之利而無水旱之儲卒遇凶  
年莫非艱食此則政乖慮始人無勸分欲免流庸不  
可得也夫氓者寔也豈能自謀政者正也當矯其弊  
所由長吏可不勉歟相其物土之宜務以耕桑之本  
時無妨奪吏不侵漁既富而教奚畏不理至若征鎮  
役重孤弱命窮將湏哀矜以遂仁恕其餘常科所禁  
自可舉而行之豈煩縷說方振綱領乃者庚子制書  
已明理要徐思其意勿謂空言若風教未弘議能蓋  
闕竟入朝計其幸遷除勿曰不知將自誣也方牧叅  
佐各宜思之朕所符賢能不惜官秩惟聲實是與惟  
履行是憑古者刺史入爲三公郎官出爲宰百里豈  
有限也何在汲汲不安於理郡哉誠湏勵精以俟後  
命並即好去

勅處分朝集使

勅朕受命于天義兼君父思致可封之地無忘終食  
之間自有萬邦幾將二紀而刑政或舛風俗尚澆行  
所望而未至顧本懷而自失雖朕之不德在予之過  
有歸而卿等共理患已之誠豈到至如典州當侯伯  
之尊宰邑敵子男之寵好進之輩且不務於政成欲

達之心獨未思於義取朕所以數戒勅以見意增祿  
秩以勸能何嘗有公方清白者不昇理道循良者不  
用若聲績未著黎庶未康收守未朝而輒遷叅佐踰  
年而競入此獨爲人之資地爾豈是責成之意耶以  
故一切還州將矯其弊卿等至彼明諭朕意知不以  
中外爲隔唯以億兆爲憂頃以天下浮逃先有處分  
所在括附便入差科輒相容隱亦令糾告如聞長吏  
不甚存心致令流庸更滋前弊未革自行此法卽有  
姦生逃者租庸類多乾沒長吏明察豈其然乎此色  
每年別須申省比類多少以爲殿最又獄訟所寄人

命是懸近恐妨農特原輕繫俾加閱實乃多幽枉都  
邑尚爾郡縣可知各以貶官用懲主吏自今以後天  
下繫囚等應申覆知證在遠而就中稍重者不得過  
十日次不得過五日其餘輕科量宜決遣不得因此  
復加楚毒且外臺者長吏主之至如禮義不興耕桑  
不勸孤寡不恤徭役不均不肅吏人不清盜賊不懲  
侵暴不糾姦訛有一於此是誰之過其遊僧幻者誑  
誘愚人窮其根萌特須禁絕諸軍征鎮每遣優矜如  
聞比來未免辛苦特宜撫恤使得安存今農扈戒期  
耕夫在野事非急切不得追呼卿等至州一一宣示



當遣察問勿不用心即宜好去

勅處分十道朝集使

勅十道及朝集使等信賞以勸能刑罰以懲惡謂之二柄所以一人朕念彼黎元比遭水旱而賦役不等浮惰相仍且無緝寧漸用凋弊所以慎擇長吏兼命使臣寵數所加亦云不薄智能自效豈是末圖政之殊尤求用虛佇且郡縣所理黎庶是切善爲政者防於未然均其有無省其徭役事事有豫早爲之所雖遭歲惡固亦人安况在豐年不能招緝遂使戶多虛掛人苦均攤務欲削除更成詭故已逃者未必爲削

爲姦者因此便除一以試其端豈勝其弊向若州有明牧縣有良宰而精心細理豈若是乎卿等至州將朕此意優柔慰勉各令用心招撫流庸補綴居業使免助逃之費是爲救弊之先此不存心更知何理且刺史縣令專任不輕自有非違將何率勵至如親識遊客憑恃威權囑託下寮搖動獄訟或差遣不當致令損失或處分有乖便至煩擾兼有不庸諸吏唯只自謹一身姦豪盜賊無所畏懼是虛荷榮寵徒增祿秩此而可容孰爲尸曠並委諸道條察具狀奏聞今其澤以時農桑爲重不急之務先已勒停宜更申明勿

妨春事諸處百姓貧窶者多雖有隴畝或無牛力勸  
率相助令其有秋所繫囚徒速令決斷無令寃滯致  
有妨奪鰥寡惇獨征鎮之家倍湏撫存勿有科喚朕  
有所懸爵秩惟待賢能若政舉一州惠施一縣使者  
廉問必以狀聞既能副於朕懷亦當待以不次誠可  
復也豈食言哉並即好去

勅歲初處分

勅天地以大德生群有聖人以大寶守萬物古者受  
命之君謂之承天之序明有所代夫豈徒然道若無  
欽崇命不求保帝實臨汝人曷戴君朕所以每期庶

乎合於仁覆之意也夫宓羲神農黃帝堯舜或誅而  
不怒或教而不誅彼亦何爲獨臻于此朕自有天下  
二紀及茲雖未能畫衣以禁亦未嘗刑人於市而政  
猶躋駁俗尚澆醜當是爲理之心未返於本耳凡人  
豈不仁於父母兄弟不欲於飲食衣服乎而卒被無  
孝友之名不溫飽之困其故何哉蓋未聞義方不識  
善道或任小智而爲詐或見小利而苟得致遠則窮  
繼之以暴已而身受戮誅家不相保愚妄之徒類多  
自陷訟獄之弊恒由此作吁可悲乎亦在教之不明  
也蓋刑罰者不獲已而用之天下黔黎皆朕赤子以

誠告示其或知歸何必用威然後致理先務仁恕寧  
不懷之且五常猶行豈須深識六親和睦何待丁寧  
自宜勉之以副所望刑措不用道在于茲今獻歲之  
吉迎氣伊始敬順天常無違月令所由長吏可舉舊  
章諸有嫗伏孕育之物蠢動生植之類慎無殺伐致  
令天傷九土異宜三農在候聚衆興役妨時害功特  
宜禁止以助春事至若家有征鎮人或孤惇物向陽  
和此獨憂悴良可憫也亦宜所由隨事憂恤蓋不體  
仁無以爲長不知道無以用心故道者衆妙之門而  
心者萬事之統得其要會義可以兼濟於人失其指

歸生不能自全於已故我玄元皇帝著道德經五千  
文明乎真宗致於妙思而有位者未之講習不務清  
淨欲令所爲之政教何從而致于太和者耶百辟卿  
士各須詳讀勉存進道之誠更圖前席之議至如計  
校小利綜緝煩文邀名直行去道彌遠違天和氣生  
人怨心朕甚厭之所不取也各勵精一共興玄化俾  
蒼生登於仁壽天下還於淳朴豈遠乎執行之可至  
其老子道德經宜令士庶家藏一本仍勸習讀使知  
指要每年貢舉人量減尚書論語一兩道策准數加  
老子策俾敦崇道本附益化源朕推誠與人有此教

誠必驗行事豈垂空言今之此勅亦宜家置一本每  
須三省以識朕懷

勅令禮部掌貢人

勅每歲舉人求士之本專典其事寧不重歟頃年已  
來惟考功郎所職掌位輕事重名實不倫欲盡委長  
官又詮選猥積且六官之列體國是同况宗伯掌禮  
宜主賓薦自今已後每諸色舉人及齋郎等簡試並  
於禮部集既衆務煩雜仍委侍郎專知

勅幸西京

勅朕所時邁皆順物情向屬閑輔無年遽爾東幸固  
非爲已將以息人今百穀既成庶務皆省而五陵所  
奉誠在京師安可更留周南有闕時薦宜以來年正  
月七日取南路幸西京所司准式應緣行幸所須務  
從節減所由明爲條例勿使勞煩

勅置十道使

勅歲比不登人或流亡言念菜色朕用疚懷而牧宰  
是寄惠養猶缺黎元爲本賦歛未均當守思之良所  
於邑且十道爲率六察分條周漢以還事有因革帝  
王之制義在隨時其天下諸道宜依舊遂要便置使  
令採訪處置若牧宰無政不能綱理吏人有犯所在

侵漁及物土異宜人情不便差科賦稅量事取安朕  
所責成貴在簡要其餘常務不可妄干其使宜令中  
書門下即簡擇奏聞朕將親覽焉

勅授十道使

勅言念蒼生心必遍於天下自古良牧福猶潤於京  
師所以歷選列城聿求連率豈徒刺察將委緝寧朝  
散大夫檢校御史中丞關內道宣慰賑給使上柱國  
盧絢等任寄已深聲實蕪茂咸貫通於理道益純固  
於公心或華髮不衰或白圭無玷可以範儀郡國康  
濟黎元開歲已來數州失稔煩致流亡能勿殷懷吏

又不畏不仁人或不安不便誠湏矯過必在仗賢而  
前此使車不無殷鑒事皆掣肘務欲總權小有舉於  
毫髮大莫振於綱領本不條察却用煩苛求言所期  
豈云自弊今既各膺重寄允謂通才以蠲疾苦之原  
當叶大中之義若令行一道利及萬人朕所設官以  
待能者朝之優秩必歸令譽言可復也宜副朕懷可  
依前件

勅處分舉人

勅求賢濟理詢事考言務取由衷以觀深識頃年策  
試頗成弊風所問既不切於時宜所對亦何關於政

事徒徵隱僻莫見才明以此擇賢良未得所卿等各膺推薦副朕虛求宜其悉心各盡所見勿復仍舊空載游詞各宜就食食訖就試

勅停官祭贈太子

勅諸贈太子頃年官爲立廟并致享祀雖欲歸厚而情且未安丞嘗之時子孫不預若專令官祭是以踈間親遂此爲常豈云教孝其諸贈太子有後者但官爲致廟各令子孫自主祭其祭置及官悉停若無後宜令依舊

勅處分縣令

勅諸縣令等自古致理其在命官今之所切莫如守宰朕每屬意尤重此官有善者雖遠必昇無能者從近而廢固已惟取才實非務官資事亦坦然天下所見而浮競之輩未識朕懷俾其宰邑便爲棄地或以煩碎而不專意或以僻遠而不畏法浸染成俗妨奪爲常嗷嗷下人於何寄命朕所以寢興軫念思有以濟之故令吏曹精選才幹卿等各膺推擇用簡朕心若能理化有成聲實相副必有超擢終不食言如其謂人不知惟利是視自速負敗兩喪身名智者所圖應不至是各宜勉勵以副勤祀

勅處分縣令

勅新除河南府密縣令張稷等令長之任黎庶尤切  
比嘗選衆未盡得人然而勇進之流乃非其好矯弊  
之政豈無所革今既各膺獎用當盡良能期月有成  
聲能若著所列清要惟待賢才既爾有聞不患無位  
各宜勉勵以副朕心

勅處分選人

勅朕憫茲下人不怠降寐庶乎富教寄在牧宰所以  
推擇才能親加考覈卿等各膺時用副朕虛求亦既  
得人佇聞佳政若能銳精爲理聲績有稱即當待以

不次信斯言之可復如其政不能舉行且有遺豈獨  
敗于厥躬必將坐於舉主此亦明約不得不然各宜  
勉之以成名節今賜卿少物各宜領取並於朝堂坐  
食食訖好去

勅議放私鑄錢

勅布帛不可以尺寸爲交易菽粟不可以抄勺貿有  
無故古之爲錢將以通貨幣蓋人所作非天實生頃  
者耕織爲資乃稍賤而傷本磨鑄之物却以少而致  
貴頃雖官鑄所入無幾約工計本勞費又多公私之  
間給用不贍求言其弊豈無變通往者漢文之時已

有放鑄之令雖見非於賈誼亦無廢於賢君况古往  
今來時異事變反經之義安有定耶終然固拘必無  
足用且欲不禁私鑄其理如何公卿百僚詳議可否  
朕將親覽擇善而從

勅處分宴朔方將士

勅朔方軍節度大使兵部尚書信安郡王禕總戎朔  
陞經畧萬里賦車籍馬精卒銳兵自其有虞莫不素  
練而醜虜背誕偏師致誅謀若有神取如俯拾雖廟  
畧之云遠亦將士之力焉威武載揚頑凶且懾狂寇  
覆巢以奔北群師掉鞅而來歸因其凱旋聊加宴樂

各宜坐食相與盡歡其軍將已下官賞別有處分信  
安郡王禕與一子官

勅宴幽州老人

勅幽州老人師知禮等比者林胡翻覆荐歲不寧戎  
馬之鄉良亦艱苦而賊虜自叛天實誘之主將致誅  
畧無遺噍實除邊患且減征徭卿等忠義因心遠來  
陳賀深所嘉尚並宜坐食各有賜物食訖領取

勅慮囚

勅時向炎蒸人或寃繫豈忘仁恕固須審察其京都  
城見禁囚宜令中書門下及留守檢覆訖徒已下罪



各委所由長官據情狀量決罰便放死罪已下通降  
一等有情狀難容合決格杖者決訖准例處分天下  
諸州亦並准此

勅擇日告廟

勅邊境爲患莫甚於汴胡朝廷是虞幾煩於將帥車  
徒屢出芻粟載勞使燕趙黎氓畧無寧歲而山戎種  
落常爲匪人近有野心窮而歸我曾是懷附每所撫  
柔而不變梟音輒爲獸搏幽州節度使副大使張守  
珪等乘間電發表裏奮討積年逋誅一朝翦滅則東  
北之侵便以廓清河朔之人差寬征戍此皆上憑九  
廟之略下仗群帥之功今其凱旋敢不以獻宜擇吉  
日告九廟所司准式

籍田之制

門下棗盛所以奉神祗耕籍所以助人力既義率于  
下而敬在其中是爲先農存諸大典故周宣不復於  
古而號公致諫漢文能脩其政而班史美談朕自御  
極以來動咨故實惟是千畝未展三推墮神困人降  
災移歲庸不在此良以憮然今星紀既周土膏將動  
去農祥而不日考帝籍之以時朕其親耕以實神廩  
宜令禮官博士詳擇典故有司速即施行

諸王實封制

門下先王之制封建有等諸侯所食征賦以歸河西節度大使原州都督慶王潭河東節度大使原牧棣王治河北節度大使幽州大都督鄂王洎等性皆中和行無外飾教以詩禮能漸義方雖已列於封圻竟未疇於井賦頃以孝友之習且在深宮服用之間亦從御府既申開國之典宜崇書社之數可各食實封二千戶主者施行

貶韓朝宗洪州刺史制

門下所遣使臣將恤人隱類亦論旨期於悉心而政或相蒙賞或失善以此攷理未嘗聞之朝請大夫荊州大都督府長史兼判襄州刺史山南道採訪處置等使上柱國長山縣開國伯韓朝宗亟登清要爰委條察宜恭爾職以副朕懷而乃私其所親請以爲邑未盈三載已至兩遷既殊德舉自速官謗及令按事果驗非才傷敗實多驕誣斯甚舉不爲黨豈其然歟事咨於周則異於是不能自律何以正人仍期後效且示輕貶可使持節都督洪州諸軍事守洪州刺史散官勳封如故馳驛赴任雖知人則哲在予之責已深而事上竭誠爲臣之節當勵其有賞罰不正枉直

失措陷於阿比隳我綱目有一於此誰其捨諸凡今  
刺舉宜以爲戒主者施行

廢王皇后制

門下朕承五聖之緒爲萬國之君敢以私愛而廢至  
公內顧而忘鴻業皇后王氏天命不祐華而不實居  
上畜虎狼之心御下甚鷹鷂之跡造起獄訟朋扇朝  
廷見無將之端有可諱之惡焉得敬承宗廟毋儀天  
下可廢爲庶人就別院安置刑于家室有愧昔王爲  
國大計蓋非獲已布告天下咸使知聞

停燕國中書令制

門下中書令燕國公張說徃屬艱難輸誠於履險及  
茲輔相潤色於告成而不察細微之人頗乖周慎之  
旨朕畧小存大念舊錄功且法不欲屈宜罷中樞之  
任義亦有在更崇端揆之榮可尚書右丞相仍將國  
史於宅脩撰主者施行

唐丞相曲江先生文集卷之四

終

神

Blank columns for text, containing faint bleed-through from the reverse side.

